

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা।

সংবাদ গতিধারা

ঢাকা, বৃহস্পতিবার ১০ ডিসেম্বর ২০১৫, ২৬ অগ্রহায়ণ ১৪২২

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। নারীদের চাকরি করা থেকে বিরত রাখার কোনো সুযোগ নেই
: বেগম রোকেয়া পদক প্রদান অনুষ্ঠানে প্রধানমন্ত্রী
- ২। আজ বিশ্ব মানবাধিকার দিবস : এ উপলক্ষে রাষ্ট্রপতি ও প্রধানমন্ত্রী পৃথক বাণী দিয়েছেন
- ৩। বিদ্যুৎ ব্যবহারে সংযমী হতে প্রধানমন্ত্রীর আহ্বান : বিদ্যুৎ ও জ্বালানি সপ্তাহ শুরু আজ
- ৪। প্রতিষ্ঠার সময়ক্রম অনুসারে টিভি চ্যানেল দেখাবে কেবল অপারেটররা : বৈঠকে সিদ্ধান্ত
- ৫। শ্রেণিকক্ষকে আরও আকর্ষণীয় করতে শিক্ষামন্ত্রীর নির্দেশ
- ৬। সুন্দরবন সুরক্ষায় বাংলাদেশ ভারত এক সঙ্গে কাজ করবে
: প্যারিসে দুই দেশের পরিবেশ মন্ত্রীর বৈঠক
- ৭। বাংলাদেশ-সিঙ্গাপুরের মধ্যে মাতারবাড়ি ১৪শ' মেগাওয়াট বিদ্যুৎকেন্দ্র নির্মাণে চুক্তি সই
- ৮। পৌর নির্বাচনের প্রচার শুরু : ১৪ ডিসেম্বরের আগে প্রতীক ব্যবহার নয়
- ৯। প্যানেলভুক্ত শিক্ষকদের নিয়োগের নির্দেশ : হাইকোর্টের রায়
- ১০। আইটি খাতের আয় পোশাক খাতকে ছাড়িয়ে যাবে
: প্রধানমন্ত্রীর তথ্য ও প্রযুক্তি বিষয়ক উপদেষ্টা
- ১১। হযরত শাহজালাল আন্তর্জাতিক বিমানবন্দরে সোয়া কোটি ভারতীয় রুপি উদ্বার
- ১২। বাংলাদেশ থেকে প্রতিবছর পাচার হচ্ছে ৪৪ হাজার কোটি টাকা
: গ্লোবাল ফিন্যান্সিয়াল ইন্সটিটিউটের প্রতিবেদন
- ১৩। বাণিজ্য আস্থায় বাংলাদেশ শীর্ষে : এইচএসবিসির বাণিজ্য আস্থা জরিপ

১। নারীদের চাকরি করা থেকে বিরত রাখার কোনো সুযোগ নেই

: বেগম রোকেয়া পদক প্রদান অনুষ্ঠানে প্রধানমন্ত্রী

প্রধানমন্ত্রী শেখ হাসিনা বলেছেন, ইসলাম নারীদের সুযোগ দিয়েছে এবং কর্মক্ষেত্রে তাদের অধিকার নিশ্চিত করেছে তাই কোনো অজুহাতে চাকরি করা থেকে দেশের নারীদের নিরস্ত করার কোনো অবকাশ নেই। তিনি বলেন, শালীনতা বজায় রেখে মহিলারা সকল কাজ করতে পারেন। ইসলাম একমাত্র ধর্ম, যে ধর্ম নারীদের অধিকার নিশ্চিত করেছে, হোক তা সম্পদ অথবা কর্মক্ষেত্র। প্রধানমন্ত্রী গতকাল ৯ ডিসেম্বর বুধবার ওসমানী স্মৃতি মিলনায়তনে বেগম রোকেয়া দিবসের উদ্বোধন এবং বেগম রোকেয়া পদক-২০১৫ বিতরণকালে এসব কথা বলেন। সূত্র-জনকণ্ঠ (পৃ.১,ক.৫), ইত্তেফাক (পৃ.১,ক.৫), প্রথম আলো (পৃ.২,ক.২), ইন্ডিপেনডেন্ট (শেষ পৃ.,ক.২), নিউজ টুডে (শেষ পৃ.,ক.২)।

২। আজ বিশ্ব মানবাধিকার দিবস : এ উপলক্ষে রাষ্ট্রপতি ও প্রধানমন্ত্রী পৃথক বাণী দিয়েছেন

আজ ১০ ডিসেম্বর বৃহস্পতিবার বিশ্ব মানবাধিকার দিবস। দিবসটির এবারের প্রতিপাদ্য হচ্ছে 'সব সময় আমাদের অধিকার, আমাদের স্বাধীনতা।' সারা বিশ্বের মত বাংলাদেশেও দিবসটি পালনের লক্ষ্যে বিভিন্ন সংগঠন বিস্তারিত কর্মসূচি গ্রহণ করেছে। কর্মসূচির মধ্যে রয়েছে শোভাযাত্রা, আলোচনা সভা, মানববন্ধন, সাংস্কৃতিক অনুষ্ঠান ইত্যাদি। রাষ্ট্রপতি মো. আবদুল হামিদ এবং প্রধানমন্ত্রী শেখ হাসিনা দিবসটি উপলক্ষে পৃথক বাণী দিয়েছেন। সূত্র-ইত্তেফাক (পৃ.১৫,ক.১), সংবাদ (পৃ.১,ক.২), ইনকিলাব (শেষ পৃ.,ক.১), ডেইলি স্টার (পৃ.১,ক.১), ইন্ডিপেনডেন্ট (পৃ.২,ক.৭)।

৩। বিদ্যুৎ ব্যবহারে সংযমী হতে প্রধানমন্ত্রীর আহ্বান : বিদ্যুৎ ও জ্বালানি সপ্তাহ শুরু আজ

তিন দিনব্যাপী জাতীয় বিদ্যুৎ ও জ্বালানি সপ্তাহ আজ ১০ ডিসেম্বর বৃহস্পতিবার শুরু হয়েছে। এ খাতের উন্নয়নে সরকারের কর্মকাণ্ড সম্পর্ক দেশের জনগণকে অবহিত করা এবং বিদ্যুৎ ও জ্বালানির সংযমী ও সর্বোত্তম ব্যবহার নিশ্চিত করতে জনসচেতনতা সৃষ্টিই এ কর্মসূচির উদ্দেশ্য। এ উপলক্ষে প্রধানমন্ত্রী শেখ হাসিনা বাণী দিয়েছেন। বাণীতে তিনি বিদ্যুৎ ও জ্বালানি ব্যবহারে সবাইকে সংযমী ও সাশ্রয়ী হওয়ার আহ্বান জানিয়েছেন। তিনি বলেন, ভবিষ্যৎ প্রজন্মের জন্য জ্বালানি নিরাপত্তা নিশ্চিত করা আমাদের সবার দায়িত্ব। সূত্র-যুগান্তর (পৃ.১৬,ক.৬), জনকণ্ঠ (পৃ.১,ক.৮), সংবাদ (শেষ পৃ.,ক.৪), নিউজ টুডে (পৃ.৩,ক.৫)।

৪। প্রতিষ্ঠার সময়ক্রম অনুসারে টিভি চ্যানেল দেখাবে কেবল অপারেটররা : বৈঠকে সিদ্ধান্ত

প্রতিষ্ঠার সময় অনুযায়ী ক্রম ঠিক করে টেলিভিশন চ্যানেল প্রদর্শনে কেবল অপারেটরদের নির্দেশ দেবে সরকার। অর্থাৎ, যে টেলিভিশন চ্যানেল সবার আগে সম্প্রচারে এসেছে, সেটি থাকবে এক নম্বরে। এরপর প্রতিষ্ঠার ক্রম অনুযায়ী টিভি চ্যানেল প্রদর্শনের ক্রম নির্ধারিত হবে। গতকাল ৯ ডিসেম্বর বুধবার সচিবালয়ে বেসরকারি টেলিভিশন চ্যানেলগুলোর মালিকদের সঙ্গে এক বৈঠকে এ সিদ্ধান্ত হয়েছে বলে সরকারের দুই মন্ত্রী সাংবাদিকদের জানিয়েছেন। বাণিজ্যমন্ত্রী তোফায়েল আহমেদ বলেন, দেশে চ্যানেলগুলোর ক্রম ঠিকমতো নেই, বিদেশি চ্যানেল আগে দেখায়। দেশের কোনো কোনো চ্যানেল আগে, আবার আগে প্রতিষ্ঠিত অনেক চ্যানেলই পরে আসে, এটা ঠিক না। আমরা সিরিয়াল ঠিক করে দেব। সূত্র-জনকণ্ঠ (পৃ.২,ক.৪), প্রথম আলো (পৃ.৩,ক.৬), যায়যায়দিন (পৃ.৩,ক.২), ইন্ডিপেনডেন্ট (পৃ.১,ক.৭)।

৫। শ্রেণিকক্ষকে আরও আকর্ষণীয় করতে শিক্ষামন্ত্রীর নির্দেশ

শিক্ষার্থীদের উপস্থিতি বাড়াতে শ্রেণিকক্ষকে আরও আকর্ষণীয় করতে শিক্ষকদের নির্দেশ দিয়েছেন শিক্ষামন্ত্রী নুরুল ইসলাম নাহিদ। তিনি বলেন, শুধু ক্লাসকে আকর্ষণীয় করলেই চলবে না সঙ্গে শিক্ষকদের পাঠদানের বিষয়বস্তুকে আরও আকর্ষণীয় করে তুলতে হবে। যাতে শিক্ষার্থীরা বাইরে সময় কাটাতে না চায়। গতকাল ৯ ডিসেম্বর বুধবার মিরপুর সরকারি বাংলা কলেজে মহান বিজয় দিবসের অনুষ্ঠানের আলোচনা সভায় প্রধান অতিথির বক্তব্যে তিনি একথা বলেন। সূত্র-ইত্তেফাক (পৃ.৩,ক.৫)।

৬। সুন্দরবন সুরক্ষায় বাংলাদেশ ভারত এক সঙ্গে কাজ করবে

: প্যারিসে দুই দেশের পরিবেশ মন্ত্রীর বৈঠক

সুন্দরবনের সুরক্ষার জন্য বাংলাদেশ এবং ভারত একসাথে কাজ করবে। প্যারিসে গতকাল ৯ ডিসেম্বর বুধবার বাংলাদেশের পরিবেশ ও বনমন্ত্রী আনোয়ার হোসেন মঞ্জু এবং ভারতের পরিবেশ মন্ত্রী প্রকাশ জাবেদকারের বৈঠকে এ অঙ্গিকার ব্যক্ত করা হয়েছে। এতে সুন্দরবনের পাশাপাশি রয়েল বেঙ্গল টাইগার রক্ষার বিষয়টি নিয়েও

আলোচনা হয়েছে। দুই মন্ত্রী বলেন, জলবায়ু পরিবর্তন ইস্যুতে বাংলাদেশ এবং ভারতের সমস্যাগুলো অভিন্ন। সূত্র-ইত্তেফাক (পৃ.১,ক.২), প্রথম আলো (শেষ পৃ.,ক.৪), জনকণ্ঠ (শেষ পৃ.,ক.১), ডেইলি অবজারভার (পৃ.১,ক.৬), ডেইলি স্টার (শেষ পৃ.,ক.৮)।

৭। **বাংলাদেশ-সিঙ্গাপুরের মধ্যে মাতারবাড়ি ১৪শ' মেগাওয়াট বিদ্যুৎকেন্দ্র নির্মাণে চুক্তি সই**

কক্সবাজারের মহেশখালী উপজেলার মাতারবাড়িতে কয়লাভিত্তিক ৭শ' মেগাওয়াটের দুটি (১৪শ' মেগাওয়াট) বিদ্যুৎকেন্দ্র নির্মাণের লক্ষ্যে বাংলাদেশ ও সিঙ্গাপুরের মধ্যে সমঝোতা স্মারক (এমওইউ) স্বাক্ষর হয়েছে। গতকাল ৯ ডিসেম্বর বুধবার রাজধানীর বিদ্যুৎ ভবনে বাংলাদেশের রাষ্ট্রায়ত্ত্ব প্রতিষ্ঠান কোল পাওয়ার জেনারেশন কোম্পানি অব বাংলাদেশ ও সিঙ্গাপুরের রাষ্ট্রায়ত্ত্ব প্রতিষ্ঠান সেমবেকোর্প ইউটিলিটিজ লিমিটেডের মধ্যে এই চুক্তি স্বাক্ষর হয়। বিদ্যুৎ, জ্বালানি ও খনিজসম্পদ প্রতিমন্ত্রী নসরুল হামিদ বিপু অনুষ্ঠানে প্রধান অতিথি হিসেবে উপস্থিত ছিলেন। সূত্র-সংবাদ (শেষ পৃ.,ক.১), জনকণ্ঠ (পৃ.২,ক.১), যুগান্তর (পৃ.২,ক.৭), নিউ নেশন (পৃ.১,ক.৭), ফিন্যানশিয়াল এক্সপ্রেস (পৃ.১,ক.৫)।

৮। **পৌর নির্বাচনের প্রচার শুরু : ১৪ ডিসেম্বরের আগে প্রতীক ব্যবহার নয়**

গতকাল ৯ ডিসেম্বর বুধবার থেকে আনুষ্ঠানিকভাবে শুরু হয়েছে দেশের ২৩৪টি পৌরসভায় নির্বাচনী প্রচারযুদ্ধ। তবে প্রথম দিন কোনো প্রতীক ছাড়াই নিজেদের পক্ষে ভোট চেয়ে দিনভর গণসংযোগ করেছেন মেয়র, কাউন্সিলর ও সংরক্ষিত কাউন্সিলর প্রার্থীরা। প্রথমবারের মতো কোনো স্থানীয় সরকার প্রতিষ্ঠানে দলীয় প্রতীকে মেয়র পদে নির্বাচন হতে যাওয়ায় নির্বাচনী এলাকাগুলোতে সৃষ্টি হয়েছে নতুন আমেজ। সূত্র-যুগান্তর (পৃ.১,ক.৫), সমকাল (পৃ.১,ক.৬), জনকণ্ঠ (পৃ.১,ক.২), ইন্ডিপেনডেন্ট (পৃ.১,ক.২), ডেইলি সান (পৃ.১,ক.২)। ইত্তেফাক, নিউ এজ, বাংলাদেশ টুডে এ বিষয়ে লিড নিউজ ছেপেছে।

৯। **প্যানেলভুক্ত শিক্ষকদের নিয়োগের নির্দেশ : হাইকোর্টের রায়**

নতুন রেজিস্টার্ড বেসরকারি প্রাথমিক বিদ্যালয়ের (জাতীয়করণ) সহকারী শিক্ষক পদে নিয়োগের জন্য তৈরি করা প্যানেলের শিক্ষকদের নিয়োগের নির্দেশ দিয়েছেন হাইকোর্ট। রায়ের কপি পাওয়ার পর ৬০ দিনের মধ্যে তাদের নিয়োগ দিতে বলা হয়েছে। বিচারপতি ফারাহ মাহবুব ও বিচারপতি কাজী মো. ইজারুল হক আকন্দ সমন্বয়ে গঠিত হাইকোর্ট বেঞ্চ গতকাল ৯ ডিসেম্বর বুধবার এ সংক্রান্ত জারি করা পৃথক ১৩০টি রিটের রুল নিষ্পত্তি করে এ রায় দেন। সূত্র-সমকাল (পৃ.১৯,ক.৩), যায়যায়দিন (পৃ.৩,ক.৮), যুগান্তর (পৃ.২,ক.১)।

১০। **আইটি খাতের আয় পোশাক খাতকে ছাড়িয়ে যাবে**

: প্রধানমন্ত্রীর তথ্য ও প্রযুক্তি বিষয়ক উপদেষ্টা

প্রধানমন্ত্রী শেখ হাসিনার তথ্য ও প্রযুক্তি বিষয়ক উপদেষ্টা সজীব ওয়াজেদ জয় বলেছেন, বর্তমানে তথ্য প্রযুক্তি ও সেবা পণ্যের রপ্তানি আয় বছরে ৩০ কোটি ডলার ছাড়িয়ে গেছে। আগামীতে দেশের আইটি খাত থেকে বৈদেশিক মুদ্রায় আয় তৈরি পোশাক খাতকে ছাড়িয়ে যাবে। এটাকে এগিয়ে নেবে বিপিও ইন্ডাস্ট্রি। গতকাল ৯ ডিসেম্বর বুধবার রাজধানীর একটি হোটেলে দুই দিনব্যাপী বিজনেস প্রসেস আউটসোর্সিং (বিপিও) সম্মেলনের উদ্বোধনী অনুষ্ঠানে প্রধান অতিথির বক্তব্যে তিনি একথা বলেন। সূত্র-ইত্তেফাক (শেষ পৃ.,ক.১), প্রথম আলো (পৃ.৩,ক.৭), সংবাদ (শেষ পৃ.,ক.১), ডেইলি স্টার বিজনেস (পৃ.১,ক.৪), নিউ এজ (পৃ.১,ক.৮)।

১১। **হযরত শাহজালাল আন্তর্জাতিক বিমানবন্দরে সোয়া কোটি ভারতীয় রুপি উদ্ধার**

হযরত শাহজালাল আন্তর্জাতিক বিমান বন্দরে কন্সলের প্যাকেট থেকে এক কোটি ২১ লাখ ভারতীয় রুপি উদ্ধার করেছে ঢাকা কাস্টমস। গতকাল ৯ ডিসেম্বর বুধবার 'লস্ট অ্যান্ড ফাউন্ড' শাখায় তল্লাশি চালিয়ে এ রুপি জব্দ করা হয়। তবে কাউকে আটক করা যায়নি। সূত্র-ইত্তেফাক (পৃ.৩,ক.৩), জনকণ্ঠ (পৃ.২,ক.৮), ইনকিলাব (শেষ পৃ.,ক.৬), ডেইলি অবজারভার (পৃ.১,ক.১), ফিন্যানশিয়াল এক্সপ্রেস (পৃ.১,ক.১)।

১২। **বাংলাদেশ থেকে প্রতিবছর পাচার হচ্ছে ৪৪ হাজার কোটি টাকা : গ্লোবাল ফিন্যান্সিয়াল ইন্সটিটিউটের প্রতিবেদন**

বাংলাদেশ থেকে প্রতিবছর গড়ে ৫৫৮ কোটি ৮০ লাখ ডলার পাচার হয়ে যাচ্ছে। দেশীয় মুদ্রায় যার পরিমাণ ৪৪ হাজার ১৪৫ কোটি টাকা। কালো টাকার এ উৎস হচ্ছে কর ফাঁকি, দুর্নীতিসহ বিভিন্ন অপরাধের মাধ্যমে অর্জিত অর্থ। কালো টাকা পাচারের তালিকায় বাংলাদেশের নাম এসেছে ২৬তম অবস্থানে। পার্শ্ববর্তী দেশ ভারত রয়েছে ৪র্থ স্থানে, শীর্ষে রয়েছে চীন। ২০০৪ থেকে ২০১৩ সাল পর্যন্ত তথ্য সংগ্রহ করে এ তালিকা প্রস্তুত

করেছে যুক্তরাষ্ট্র ভিত্তিক গবেষণা প্রতিষ্ঠান গ্লোবাল ফাইন্যান্সিয়াল ইন্সটিটিউট (জিএফআই)। সূত্র-ইন্ডেক্স (পৃ.১,ক.৬), ইন্ডিপেনডেন্ট (শেষ পৃ.,ক.৭)। প্রথম আলো, সমকাল, যুগান্তর, ডেইলি স্টার, ফিন্যানশিয়াল এক্সপ্রেস এ বিষয়ে লিড নিউজ ছেপেছে।

১৩। বাণিজ্য আস্থায় বাংলাদেশ শীর্ষে : এইচএসবিসির বাণিজ্য আস্থা জরিপ

বাণিজ্য আস্থায় এখন সর্বোচ্চ স্কের বা নম্বর বাংলাদেশের। বিশ্বের ২৫টি দেশের ওপর বহুজাতিক ব্যাংক দ্য হংকং অ্যান্ড সাংহাই ব্যাংকিং কর্পোরেশনের (এইচএসবিসি) এক জরিপে এমন তথ্যই উঠে এসেছে। এইচএসবিসির এই জরিপ অনুযায়ী বৈশ্বিক অর্থনীতিতে দুর্বলতার মধ্যেও চলতি বছরে দ্বিতীয় প্রান্তিকে বাংলাদেশের বাণিজ্য আস্থা সূচক বেড়েছে। সূত্র-প্রথম আলো (পৃ.১৩,ক.২), সমকাল (পৃ.১২,ক.৪), ডেইলি স্টার বিজনেস (পৃ.১,ক.১), ফিন্যানশিয়াল এক্সপ্রেস (শেষ পৃ.,ক.১)।

সম্পাদকীয়

- ক. প্রথম আলো : আসন্ন পৌরসভা নির্বাচনে প্রার্থীদের নির্বাচনী আচরণবিধি যেন লংঘিত না হয় সেব্যাপারে নির্বাচন কমিশনের নিরপেক্ষতা বজায় রাখার সুপারিশ;
- খ. ইন্ডেক্স : ই-বর্জ্যের আধিক্যে আমাদের দেশে জনস্বাস্থ্য ঝুঁকির মধ্যে পড়েছে উল্লেখ করে দেশের প্রতিটি শহরে মেডিকেল ও ই-বর্জ্যের জন্য পৃথক ভাগাড় নির্মাণের ওপর গুরুত্বারোপ;
- গ. জনকণ্ঠ : বেসরকারি শিক্ষক নিয়োগে কমিশন গঠন করার সিদ্ধান্তকে স্বাগত জানিয়ে সুনীতি, স্বচ্ছতা, দেশপ্রেম হোক শিক্ষক নিয়োগের অবলম্বন বলে প্রত্যাশা ব্যক্ত;
- ঘ. সংবাদ : সামাজিক যোগাযোগ মাধ্যম খুলে দেওয়ার সুপারিশ জানিয়ে নাশকতা দমনে ও আইনশৃঙ্খলা রক্ষায় সরকারকে প্রযুক্তিগত ক্ষমতা ও দক্ষ জনবল বাড়ানোর ওপর গুরুত্বারোপ;
- ঙ. যুগান্তর, ইন্ডেক্স, প্রথম আলো, ভোরের কাগজ, ইনকিলাব, যায়যায়দিন : রাজধানীর শ্যামপুরে স্যুরেজের খোলা ম্যানহোলে পড়ে নীরব নামে একটি শিশুর মর্মান্তিক মৃত্যু এক বছর আগের শাহজাহানপুরে পরিত্যক্ত পানির পাইপে পড়ে শিশু জিহাদের মৃত্যুর কথা মনে করিয়ে দেয় উল্লেখ করে এধরনের ঘটনার জন্য দায়ী প্রতিষ্ঠানের বিরুদ্ধে কঠোর আইনি পদক্ষেপ নেওয়ার দাবি;
- চ. ইন্ডিপেনডেন্ট : আইবিএস বাব্বের চেয়ে সিএফএলএস ল্যাম্প অনেক বেশি বিদ্যুৎ সাশ্রয়ী ও স্থায়ীত্ব ১০ গুণ বেশি হওয়ায় বাংলাদেশে সিএফএলএস ল্যাম্প ব্যবহার বাড়ানোর পদক্ষেপ নেওয়ার আহ্বান;
- ছ. ডেইলি সান : জাতীয় বিশ্ববিদ্যালয় ও কিছু বেসরকারি বিশ্ববিদ্যালয়ের দেওয়া গ্রাজুয়েশনের মান নিয়ে বিশ্ববিদ্যালয় মঞ্জুরী কমিশনের অভিমতের প্রেক্ষিতে এ বিষয়ে সময় উপযোগী ব্যবস্থা নেওয়ার প্রত্যাশা;
- জ. নিউ এজ : স্বাস্থ্য সেবায় ব্যয় বেড়ে যাওয়ায় সরকারি হাসপাতালে প্রয়োজনীয় যন্ত্রপাতি ও জনবল বৃদ্ধি করে সেবার মান বাড়িয়ে সাধারণ জনগণের সেবা প্রাপ্তি সুলভ করার ওপর গুরুত্বারোপ করে সম্পাদকীয় প্রকাশ করেছে।

উপ-সম্পাদকীয়

প্রথম আলো পত্রিকায় প্রকাশিত কলামে জনগণকে পূর্ণরূপে সম্পৃক্ত করেই কেবল রাষ্ট্রের প্রকৃত নিরাপত্তা নিশ্চিত করা সম্ভব বলে উল্লেখ করা হয়েছে।

নিবন্ধ ও ফিচার

ইন্ডেক্স পত্রিকায় প্রকাশিত ‘নির্বাচন কমিশনের জন্য চ্যালেঞ্জ’ শিরোনামের নিবন্ধে আশিষ সৈকত পৌরসভা নির্বাচন হলেও দলীয় প্রতীকে নির্বাচন হওয়ায় এটি গ্রহণযোগ্য করার চ্যালেঞ্জ এখন নির্বাচন কমিশনের বলে অভিমত প্রকাশ করেছেন।

#

ফারহানা/মরজিনা/সাদ্দা/বিপু/২০১৫/৯.০০ ঘণ্টা